

Mid-Day Dogri News Bulletin, 08th July 2025

समे – 12:25

<><><><><>

एह आकाशवाणी जम्मू ऐ, हुन तुस श्रुति खजूरिया कोला खबरां सुनो।

LG-Nunvan Visit

उपराज्यपाल मनोज सिन्हा होरें पहलगाम आले आधार शिविर दा दौरा लाया ते श्री अमरनाथ जी दी यात्रा पर आवा'रदे श्रद्धालुएं गी दित्ती जा'रदी सहूलतें दा जायजा लैता। इस मौके पर उपराज्यपाल होरें श्रद्धालुएं, सेवाएं देने आले, लंगर ते साफ सफाई करने आले कन्नै गल्लबात कीती। उपराज्यपाल होरें इस पवित्र यात्रा दे रमानदारी ते बवस्थित ढंगै सिर चलाने लेई सब्बने मुत्तलका घड़ें गी सराहना कीती। अपने दौरे दरान उपराज्यपाल होरें प्रशासनिक ते सुरक्षा अधिकारिएं कन्नै बैठक लाइयै सुरक्षत ते रमानदारी आले ढंगै सिर यात्रा जकीनी बनाई रखने आले उपाएं बारे बी चर्चा कीती।

<><><><><>

Amarnath Yatra

जम्मू दे भगवती नगर आले आधार शिविर थमां 7 जहार 541 श्रद्धालुएं दा 7मां जत्था सख्त सुरक्षा बंदोबस्ते हेठ अज्ज बडले घाटी लेई रवाना होआ। एह श्रद्धालु 309 गड्डिडएं दे काफले च सुआर होइयै अगडर यात्रा लेई रवाना होआ। अज्ज आले जत्थे च 5 जहार 516 मर्द, इक जहार 765 महिला, 39 बच्चे, 221 साधु ते साध्वियां शामिल हे। 3 जहार 321 श्रद्धालु बालटाल लेई ते 4 जहार 220 पहलगाम रवाना होए। कल 23 जहार 857 श्रद्धालुएं बाबा बर्फानी दे दर्शन कीते। कल संजा तगर कुल 93 जहार थमां मते श्रद्धालुएं दी अमरनाथ जी दी पवित्र गुफा दे दर्शन करी चुके दे न मे मेद ऐ जे अज्ज उह आंकड़ा इक लक्ख गी पार करी जाग।

<><><><><>

LG-GPC Delegation

जिला बारामुला दी गुरुद्वारा प्रबंधक कमेटी दे इक प्रतिनिधिमंडल नै उपराज्यपाल मनोज सिन्हा हुंदे कन्नै मलाटी कीती। इस दरान सिक्ख समुदाय दे कल्याण ते उंदे सशक्तिकरण सरबंधी केई मामलें पर चर्चा होई, एहदे अलावा एसआरओ 425 दे लाह नान माइग्रेंट सिक्ख समुदाय गी बी हासल करोआने बारे च जेएंडके सिक्ख विकास बोर्ड दा गठन करने जनेह मामले पर चर्चा होई। उपराज्यपाल होरें प्रतिनिधिमंडल गी गी भरोसा दोआया जे जायज मंगें पर लोड़चदी ते बनकदी कारवाई कीती जाग।

<><><><><>

PM Advisor Meeting

प्रधानमंत्री हुंदे सलाहकार तरुण कपूर होरें इक उच्ची सतह दी बैठक दरान च जम्मू कश्मीर दी विकास यात्रा बारे समीक्षा कीती। मुख सचिव अटल डुल्लू हुंदे सने होरने आला अधिकारिएं बी बैठक च हिस्सा लैता। बैठक दरान प्रमुख पनबिजली परियोजनाएं दे कम्मकाजें दा बी जायजा लैता गेआ जेहदे च पकल-डूल, किरु, क्वार ते रैटल पनबिजली परियोजना शामिल न। एहदे अलावा सलाहकार होरें प्रमुख रेल परियोजनाएं दे कम्में बारे बी समीक्षा कीती। जेहदे च उधमपुर-श्रीनगर-बारामुला रेल लिंक सनें नभें बनाए जा'रदे कोरीडोर जिआं जे काजीकुंड-बडगाम डबल लाइन, बारामुला-उड़ी, सपोर-कुपवाड़ा ते अनंतनाग-पहलगाम ते जम्मू-कटरा डबल लाइन शामिल न। इस्सै दरान

शिड़कें सरबंघी ढांचे दा बी जायजा लैता गेआ ते जम्मू ते श्रीनगर च एम्स अस्पतालें बारे बी व्यापक समीक्षा कीती गई।

<><><><><><>

Dy. CM BRO

जम्मू संभाग दे बीआरओ दे चीफ इंजीनियर ब्रिगेडियर आर.के.मिश्रा होरें कल उपमुख्यमंत्री सुरिन्दर चौधरी हुंदे कन्नै मलाटी कीती ते जम्मू खित्ते च बीआरओ आस्सेआ चलाई जा'रदी शिड़क परियोजनाएं दे कम्मकाजै बारे जानकारी दित्ती। बैठक दरान ब्रिगेडियर मिश्रा होरें जम्मू खित्ते दे पीर पंचाल इलाके खास करियै मुगल रोड पर चला'रदेकम्में बारे जानकारी दित्ती। उपमुख्यमंत्री होरें गल्लबात दरान आखेआ जे परियोजना दी प्रगति च पेश आवा'रदी अड़चने दा तौले गै हल्ल कड़डेआ जा। उनें जोर देइयै आखेआ जे मुख्य शिड़क परियोजना च पेश आवा'रदी दिक्कतें दा तौले नबेड़ा बड़ा मता जरूरी तां जे सबै कम्में समें सिर मुकम्मल होई जान ते इनेंगी पूरा करने च मता चिर नेई लग्गे।

<><><><><><>

Fire Poonch

पुंछ दे मुख्य शिक्षा दफ्तर दे परिसर च कायम समग्र स्टोर च अज्ज बडलै अग्ग लग्गी गई। इस घटना करी केई सारे महत्वपूर्ण दस्तावेजें ते कताबें गी नुकसान पुज्जा ऐ। चश्मदीद मूजब अग्ग स्टोर च लग्गी ते तौले गै फैली गई। अग्ग स्थालने आले कर्मी मौके आली थाहर पर पुज्जे ते इक घेंटे थमां मते चिरे मगरा अग्ग पर काबू पाया गेआ।

<><><><><><>

Rudar Ganga Yatra

जिला विकास काँसल दे अध्यक्ष डी.एस.कोतवाल होरें डोडा थमां रुद्र गंगा यात्रा गी झंडी दस्सियै रवाना कीता। एह्दे च लोकें बड़े गै उत्साह कन्नै हिस्सा लैता। रवाना होने थमां पैहले पूजा अर्चना बी कीती गई। एह यात्रा चंडी धार देसा लेई रवाना होई। चैयरमैन होरें इस यात्रा दे आध्यात्मिक ते सांस्कृतिक महत्व गी उजागर कीती ते गलाया जे एह कार्यक्रम आगामी सौहार्द ते खित्ते दी समृद्ध सांस्कृति गी बढ़ावा दिंदे न।

<><><><><><>

DC-Udhampur GMC

उधमपुर दियां डिप्टी कमीशनर सलोनी राय होरें बेली च नमैं बनाए जा'रदे सरकारी मैडिकल कालेज दे इसलै जारी निर्माण कम्में दी प्रगति दा जायजा लैता। दौरे दरान डिप्टी कमीशनर होरें कम्में गी तोड़ चाढ़ने च पेश आवा'रदी दिक्कतें परेशानिएं गी तौले पुर करने पर जोर पाया। उनें मुत्तलका अजेंसी गी आखेआ जे कम्में गी समें सिर पूरा करने लेई जेकर डबल शिफ्ट लानी पोए तां इसी अपनाइयै समें दे अंदर अंदर पूरा करना जकीनी बनान। एह्दे अलावा डिप्टी कमीशनर होरें मुत्तलका अजेंसिएं गी रफ्तार दे कन्नो कन्नी उच्ची मयार जकीनी बनाने लेई बी निर्देश दित्ते।

<><><><><><>